

## LAPORAN TAHUNAN DARUL QURAN JAKIM 2016

JANUARI 2016

### MAJLIS SAMBUTAN PELAJAR BAHARU PROGRAM PENSIJILAN TAHFIZ AL-QURAN JAKIM–UIAM

#### **Darul Quran Raikan Pelajar Baharu Program Pensijilan Tahfiz al-Quran Jakim-UIAM Sesi 2016/2017**

Seramai 116 pelajar baharu Program Pensijilan Tahfiz al-Quran Jakim–UIAM mula mendaftar masuk bermula jam 8.30 pagi 5 Januari 2016. Para pelajar tersebut diraikan pada Majlis Sambutan Pelajar Baharu Program Pensijilan Tahfiz al-Quran Jakim–UIAM yang telah disempurnakan oleh Timbalan Ketua Pengarah Pembangunan Insan Jakim, Dato' Haji Razali Bin Shahabudin.

Beliau dalam ucapan perasmiannya mengucapkan syabas dan tahniah kepada para pelajar yang terpilih untuk mengikuti program pengajian selama 18 bulan ini meskipun pelajar berhadapan pelbagai ujian disebabkan kejadian banjir yang menimpa kebanyakan negeri disebelah pantai timur.

*“Para pelajar hendaklah mengelakkan diri daripada perkara-perkara yang melalaikan dan boleh menghilangkan hafazan serta menghias diri dengan adab dan akhlak mulia seiring dengan peribadi seorang penghafaz al-Quran”, tambah beliau lagi.*

Turut hadir dalam majlis tersebut adalah Dekan Pusat Asasi Universiti Islam Antarabangsa Malaysia (UIAM) yang juga merangkap sebagai Ahli Jawatankuasa Penasihat Akademik Darul Quran, Prof. Madya Dr. Shamsul Jamili bin Yeob yang turut menjelaskan bahawa para pelajar yang terpilih untuk masuk ke Program Pensijilan ini sangat bertuah kerana UIAM merupakan di antara universiti bertaraf antarabangsa yang setaraf dengan universiti terulung di dunia.

Agenda seterusnya merupakan bacaan ikrar dan majlis penyerahan pelajar kepada pihak Darul Quran. Para pelajar ini juga akan mengikuti Program Transformasi Kecemerlangan Minda (TRANSKEM) selama 5 hari bermula 5 Januari 2016 sehingga 9 Januari 2016.



*Nota : Bacaan Ikrar oleh Pelajar Baharu Program Pensijilan Tahfiz Al-Quran Jakim–UIAM sesi 2016/2017.*

**MAJLIS KHATAM HAFAZAN AL-QURAN PELAJAR PROGRAM DIPLOMA SESI  
PENGAJIAN 2013-2016**

Seramai 205 orang pelajar semester enam program Diploma Tahfiz Al-Quran telah diraikan dalam Majlis Khatam Hafazan Al-Quran yang telah diadakan di Dewan Mukhtar baru-baru ini. Majlis yang memilih merah jambu sebagai warna tema ini telah dirasmikan oleh Timbalan Ketua Pengarah Pembangunan Insan Jakim, Dato' Haji Razali Bin Shahabuddin mewakili Ketua Pengarah Jakim.

Beliau yang dalam ucapannya telah mengucapkan syabas dan tahniah kepada para pelajar yang telah berjaya menamatkan hafazan al-Quran 30 juz' dalam tempoh tiga tahun pengajian di Darul Quran. Beliau juga telah mengingatkan pelajar agar tidak terlalu selesa dengan suasana dan biah di Darul Quran kerana pelajar akan berhadapan dengan cabaran yang lebih luas di apabila keluar dari Darul Quran. Justeru kata beliau lagi pelajar perlu menjaga nama baik sebagai penghafaz al-Quran walau di mana sahaja berada.

Terdahulu, majlis ini telah diserikan dengan bacaan ayat-ayat suci al-Quran dari Surah al-Dhuha hingga Surah al-Nas oleh pelajar 94 orang pelajar banin dengan dipimpin oleh tiga orang pensyarah Darul Quran iaitu Us. Wan Ahmad Ikram Bin Wan Mohamed, Us. Mohd Farhan Bin Khalid dan Us. Kyairool Nizam Bin Khiruddin.

Dato' Haji Razali Bin Shahabuddin yang diiringi oleh Dr Haji Nordin Bin Ahmad telah menyampaikan Anugerah Pelajar Cemerlang kepada saudara Wan Mohd Syahmi Bin Wan Ahmad dan saudari Zirwatulamal Binti Mohammad Idrus. Beliau juga turut menyampaikan Anugerah Pensyarah Tasmi' Cemerlang kepada Us. Muhammad Zaki Bin Ab Rahman dan Ust. Nurul Firdaus Binti Rejab serta sijil khatam kepada 205 orang pelajar.

Turut hadir meraikan majlis ialah Pengarah-Pengarah Bahagian Jakim, ketua-ketua jabatan dan pengetua-pengetua sekitar Hulu Selangor, ibu bapa, para pensyarah serta pegawai dan kakitangan Darul Quran Jakim.



*Nota : Bacaan Doa Khatam Al-Quran yang dipimpin oleh Wan Ahmad Ikram, pensyarah tasmi' Darul Quran Jakim.*

### **NAIB CANSELOR USIM MENGADAKAN LAWATAN KERJA KE DARUL QURAN**

Naib Canselor Universiti Sains Islam Malaysia (USIM), Prof. Dato' Dr Musa Bin Ahmad berserta delegasi telah mengadakan lawatan ke Darul Quran pada 26 Februari 2016.

Beliau yang dalam rangka lawatan selama dua hari telah menghadiri taklimat bersama pengurusan tertinggi Darul Quran, perjumpaan bersama pelajar Ijazah Sarjana Muda Pengajian Quran & Sunnah USIM-DQ serta Program Mendaki Bukit Kutu Kuala Kubu Bharu pada keesokannya.

Timbalan Ketua Pengarah Pembangunan Islam Jakim, Dato' Haji Razali Bin Shahabuddin telah berbesar hati untuk turut hadir bersama meraikan delegasi USIM seterusnya memberikan ucapan aluan dalam taklimat bersama para tetamu.

Beliau yang dalam ucapan aluannya telah mengucapkan selamat datang kepada para tetamu dan telah menyatakan sejarah berkaitan hubungan kerjasama antara Darul Quran dengan USIM berkenaan program Ijazah Sarjana Muda Pengajian Quran & Sunnah.

Beberapa perkara telah dibincangkan dalam taklimat tersebut terutama berkaitan pelajar-pelajar ijazah serta perkara-perkara berkaitan kerjasama antara USIM dan Darul Quran. Selesai taklimat, Prof. Dato' Dr Musa kemudiannya dibawa ke dewan taklimat Perpustakaan Darul Quran untuk perjumpaan bersama para pelajar ijazah.

Pihak pengurusan tertinggi USIM turut berbesar hati menyumbangkan 10 buah basikal kepada pelajar-pelajar Darul Quran Jakim.



*Nota : Naib Cancellor USIM merakam kenangan selepas mengadakan pertemuan bersama Timbalan Ketua Pengarah Pembangunan Insan Jakim dan pihak pengurusan Darul Quran.*

### **SAMBUTAN JUBLI EMAS ULANGTAHUN YANG KE-50 DARUL QURAN JAKIM**

#### **Majlis Bacaan Yaasin, Tahlil Dan Doa Selamat Sempena Sambutan Jubli Emas Ulangtahun Yang Ke 50 Darul Quran Jakim**

Darul Quran telah menyambut ulangtahun yang ke-50 dengan mengadakan Majlis Bacaan Yaasin, Tahlil Dan Doa Selamat pada 1 Mac 2016. Majlis ini telah diserikan lagi dengan kehadiran Generasi Ke-2 Darul Quran, Dato' Haji Hassan Mahmud Al-Hafiz. Beliau telah mengetuai bacaan Yasin, Tahlil dan Doa Selamat dan diikuti bersama warga Darul Quran serta tetamu jemputan.

Majlis yang diadakan selepas solat Asar secara berjemaah ini telah dirasmikan oleh Timbalan Ketua Pengarah Pembangunan Insan Jakim, Dato' Haji Razali Shahabudin mewakili Ketua Pengarah Jakim.

Beliau yang dalam ucapannya telah menceritakan tentang sejarah perkembangan Darul Quran bermula pada tahun penubuhannya iaitu pada 1 Mac 1966 hinggalah sekarang. Beliau juga telah menyatakan bahawa Darul Quran pada 50 tahun yang lalu bermula dengan hanya lapan orang pelajar sahaja dan sekarang jumlah graduan Darul Quran adalah sebanyak 2,694 orang, tidak termasuk pelajar-pelajar dari Maahad-Maahad Tahfiz Al-Quran Negeri yang bernaung di bawah Darul Quran.

Terdahulu, Pengarah Darul Quran, Dr. Haji Nordin Bin Ahmad telah menyampaikan ucapan aluan. Dalam ucapan aluannya, beliau telah menyatakan perancangan-perancangan Darul Quran dalam menyambut Jubli Emas pada tahun ini.

Selain bacaan yaasin, tahlil dan doa selamat, majlis diserikan lagi dengan tayangan video sejarah Darul Quran, bacaan 'hafiah' tarannum serta qasidah yang dipersembahkan oleh wakil pelajar semester enam.

Sebanyak lima biji kek selain kek utama untuk gimik perasmian telah disumbangkan bagi memeriahkan lagi majlis ini. Kek-kek tersebut telah disumbangkan oleh Cawangan Kualiti Pendidikan Tahfiz, Koperasi Darul Quran, Puspanita Darul Quran, Persatuan Kebajikan Maahad Tahfiz (PERKEMAT DQ) dan Perwakilan Mahasiswa USIM-DQ (PERMAS).



*Nota : Bacaan Yaasin, Tahlil dan Doa Selamat dipimpin oleh Al-Fadhil Ustaz Hassan Mahmud Al-Hafiz.*

### **MESYUARAT LEMBAGA DARUL QURAN KALI KE-29 BERSIDANG DI ILIM BANGI**

Mesyuarat Lembaga Darul Quran kali ke-29 telah berlangsung pada 28 Mac 2016 bertempat di Bilik Mesyuarat Abu Bakar As-Siddiq, Blok Akademik A, Institut Latihan Islam Malaysia (ILIM) Bangi.

Mesyuarat ini telah dipengerusikan oleh Ketua Pengarah Jakim, Dato' Haji Othman Bin Mustapha. Beliau yang dalam ucapan aluannya mengucapkan terima kasih kepada semua Ahli Lembaga Darul Quran kerana sudi hadir ke mesyuarat tersebut walaupun dalam kesibukan tugas masing-masing.

Mesyuarat yang dihadiri oleh 16 orang Ahli Lembaga Darul Quran ini telah membincangkan berkenaan lapan kertas cadangan berkaitan Kertas Laporan Peperiksaan Diploma Semester Enam & Semester Lapan Darul Quran Jakim bagi Tahun 2016, Kertas Laporan Peperiksaan Akhir Pensijilan Semester Empat (Program Empat Semester) & Semester Tujuh (Program Tujuh Semester) Jakim-Uniten Tahun 2015, Kertas Cadangan Semakan Semula Kurikulum Program Pensijilan Tahfiz DQ-OKUMP, Kertas Cadangan Melaksanakan Program Sijil

Lanjutan Bagi Pelajar DQ–OKUMP, Kertas Cadangan Logo Darul Quran Jakim, Kertas Cadangan Menaik Taraf Fungsi dan Peranan Darul Quran Jakim dan Kertas Cadangan Dasar Pengambilan Pelajar Luar Negara Darul Quran Jakim.

Selain itu, dua kertas makluman juga turut dibentangkan berkaitan Makluman Pelaksanaan Sambutan Jubli Emas Darul Quran Jakim Tahun 2016 dan Makluman Pelaksanaan MQA01.

Ahli-ahli Lembaga Darul Quran yang hadir dalam mesyuarat pada kali ini ialah Dato' Haji Razali Bin Shahabudin, Datuk Haji Mohamad Nordin Bin Ibrahim, Dato' Haji Wan Mohamad Bin Dato' Sheikh Abdul Aziz, Y.Bhg. S.S. Datuk Dr Zulkifli Bin Mohamad Al-Bakri, Prof. Dato' Dr Sidek Bin Baba, Prof. Dr Zulkiple Bin Abd Ghani, Prof. Madya Dr Shamsul Jamili Bin Yeob, Prof. Dr Wan Kamal Mujani, En. Masri Bin Razali, Puan Hajjah Zawanah Binti Muhammad, En. Hassan Nudin Bin A. Hamid dan En. Imran Bin Abdullah, Dr Monika@Munirah Binti Abd Razzak, Puan Zuriyati Binti Mohd Noor dan Pengarah Darul Quran, Dr. Haji Nordin Bin Ahmad selaku Setiausaha.

Turut hadir dalam Mesyuarat Lembaga ini ialah Haji Mohd Said Bin Md Amin, Pengetua Maahad Tahfiz Al-Quran Masjid Saidina Ali, Bukit Katil Melaka untuk membentangkan Kertas Cadangan Permohonan Maahad Tahfiz Al-Quran Masjid Sayyidina Ali, Bukit Katil, Melaka Bagi Menawarkan Program Baru Diploma Tahfiz Al-Quran Dan Pengurusan Halal.



*Nota : Barisan Ahli Lembaga Darul Quran Jakim bergambar selepas berakhirnya persidangan yang berlangsung di ILIM, Bangi.*

### **DARUL QURAN TEMPAT KETIGA KONVENSYEN KIK PERINGKAT JAKIM 2016**

Seramai enam kumpulan dari lima Bahagian Jakim telah menyertai Konvensyen Kumpulan Inovatif Dan Kreatif yang telah diadakan pada 10 Mac 2016 bertempat di Institut Latihan Islam Malaysia (ILIM), Bangi. Kumpulan-kumpulan tersebut ialah Kumpulan Q-Faz serta Q<sup>2</sup> dari Darul Quran, Kumpulan Putra Innovator dari Masjid Putra, Kumpulan G2G dari Hab Halal, Kumpulan Kicho dari Jakim Sarawak dan Kumpulan Ilimians dari ILIM.

Tajuk-tajuk yang dipersembahkan oleh kumpulan-kumpulan tersebut ialah “Membantu Meningkatkan Penguasaan Hafazan Al-Quran Dalam Kalangan Pelajar Di Peringkat Awal Hafazan” dan “Tahap Penguasaan Bacaan Qiraat 10 Dalam Kalangan Pelajar Darul Quran Kurang Memuaskan” bagi Kumpulan Q-Faz serta Q<sup>2</sup>.

Manakala bagi Kumpulan Putra Innovator pula, mereka mempersembahkan tajuk “Ke Arah Memperkasakan Masjid Putra Sebagai Ikon Pelancongan Islamik Negara”. Bagi Kumpulan G2G, mereka telah mempersembahkan tajuk “Kelewatan Permohonan Sijil Halal Malaysia Mendapat Pengesahan Halal Melebihi Tempoh Masa Yang Ditetapkan”

Sementara bagi Kumpulan Kicho dan Ilimians pula, mereka mempersembahkan tajuk “Tahap Pembacaan Al-Quran Yang Tidak Memuaskan Dalam Kalangan Saudara Baharu” dan tajuk “Penggunaan Tenaga Pengajar Di ILIM Yang Tidak Optimum.”

Konvensyen Kumpulan Inovatif Dan Kreatif 2016 ini telah dirasmikan oleh Ketua Pengarah Jakim, Dato’ Haji Othman Bin Mustapha. Beliau yang dalam ucapan perasmiannya telah memuji Darul Quran kerana telah menghantar dua penyertaan dalam konvensyen tersebut.

Hadiah bagi pemenang tempat pertama ialah wang tunai RM5,000, sijil penyertaan serta piala pusingan. Tempat kedua; wang tunai RM3,000 serta sijil penyertaan dan tempat ketiga ialah wang tunai RM2,000 dan sijil penyertaan.

Tempat pertama Konvensyen Kumpulan Inovatif Dan Kreatif 2016 ialah Kumpulan G2G dari Hab Halal, sementara Kumpulan Kicho dari Jakim Sarawak mendapat tempat kedua. Manakala Kumpulan Q<sup>2</sup> dari Darul Quran telah mendapat tempat ketiga. Hadiah telah disampaikan oleh Dato’ Haji Othman Bin Mustapha diiringi oleh Timbalan Ketua Pengarah Dasar Jakim, Datuk Haji Mohamad Nordin Bin Ibrahim, Timbalan Ketua Pengarah Pengurusan Jakim, En. Masri Bin Razali dan Pengarah Bahagian Dakwah Jakim, Dato’ Haji Ali Bin Mohammed.



*Nota : Barisan ahli Kumpulan Inovatif & Kreatif (KIK) Darul Quran bergambar selepas berjaya merangkul tempat ketiga di dalam Konvensyen KIK 2016.*

## PELANCARAN LOGO DARUL QURAN

### **Logo Darul Quran Dimasyhurkan Dalam Perhimpunan Bulanan Jakim**

Logo Darul Quran telah dimasyhurkan dalam Perhimpunan Bulanan Jakim bagi Bulan April 2016. Manakala perhimpunan ini pula telah diadakan di Dewan Datuk Mohd Shahir, Institut Latihan Islam Malaysia (ILIM), Bangi pada 29 April 2016.

Logo Darul Quran ini telah diperakui oleh ahli-ahli Mesyuarat Lembaga Darul Quran kali ke-29 yang telah bersidang pada 28 Mac 2016 bertempat di Bilik Mesyuarat Abu Bakar As-Siddiq, Blok Akademik A, Institut Latihan Islam Malaysia (ILIM) Bangi.

Pemasyhuran ini dibuat dalam bentuk tayangan montaj yang berdurasi selama tiga minit. Antara perkara yang dipaparkan dalam montaj tersebut ialah logo Darul Quran, intepetasi logo dan diakhiri dengan nama pencipta logo iaitu Us. Muhammad Saoki Bin Abd Rahman, Pensyarah Jabatan Pengajian Umum, Darul Quran Jakim.

Berikut merupakan intepetasi kepada Logo Darul Quran:

1. Bentuk kitab terbuka di atas simbolik kepada al-Quran dan hadis yang merupakan dua bidang teras di samping rujukan utama dalam pembinaan dan pengembangan ilmu bagi melahirkan generasi rabbani.
2. Bentuk rehal yang sinonim dengan masyarakat Islam sebagai alas al-Quran simbolik kepada teguhnya pegangan al-Quran yang menjadi prinsip kepada umat Islam.
3. Bentuk kubah yang melambangkan syiar Islam yang merupakan panji kepada Umat Islam yang dibawa oleh Darul Quran Jakim dan kerajaan Malaysia.
4. Empat tiang yang membentuk kubah melambangkan teras pegangan masyarakat di Malaysia yang berpegang kepada sumber al-Quran, Sunnah, Ijma' dan Qiyas.
5. Perkataan Darul Quran yang menggunakan khat kufi murabba' ini diintepetasikan sebagai Darul Quran merupakan nama yang tidak asing dengan peranannya sebagai sebuah institusi pendidikan tahfiz terulung di negara Malaysia.
6. Perkataan "*Qara'a*" di tengah sebagai teras dalam menuntut ilmu yang melambangkan kesungguhan para pelajar Darul Quran dalam menuntut ilmu.
7. Perkataan "*Laam*" yang berbentuk kubah merujuk kepada peranan Darul Quran memayungi pengajian tahfiz di Malaysia.

8. Perkataan Darul Quran Jabatan Kemajuan Islam Malaysia dalam tulisan rumi bertujuan untuk memudahkan memahami perkataan Darul Quran yang merupakan salah satu bahagian di Jabatan Kemajuan Islam Malaysia.
9. Warna *maroon* yang merupakan warna korporat Darul Quran melambangkan semangat yang mapan, kesediaan dan keupayaan Darul Quran sebagai institusi tahfiz al-Quran terulung di Malaysia.
10. Warna emas diintegrasikan sebagai peranan Darul Quran melahirkan penghafaz al-Quran yang paling bernilai sebagai aset penting negara.
11. Warna biru melambangkan warga Darul Quran yang berketrampilan, berdedikasi dan berhikmah dalam membangunkan modal insan yang berkualiti tinggi.



**MAJLIS SAMBUTAN SISWA SISWI BARU PROGRAM DIPLOMA TAHFIZ AL-QURAN  
SESI PENGAJIAN 2016/2019**

**Jagalah Nama Baik Darul Quran – TKPPI**

Timbalan Ketua Pengarah Pembangunan Insan Jakim, Dato' Haji Razali Bin Shahabudin menyeru kepada siswa siswi baru Program Diploma Tahfiz Al-Quran agar sentiasa menghiaskan diri dengan akhlak dan sifat mulia serta menjaga adab tidak kira kepada sesiapa pun. Ini kerana, setiap perilaku yang ditonjolkan oleh para pelajar akan menyebabkan nama Darul Quran juga turut terpalit. Beliau juga mengingatkan agar pelajar-pelajar menjaga nama baik Darul Quran dengan sebaiknya sebagaimana para pelajar menjaga nama baik ibu bapa sendiri.

Demikian antara nasihat yang diberikan oleh Dato' Haji Razali dalam ucapan perasmiannya ketika Majlis Sambutan Siswa Siswi Baru Program Diploma Tahfiz Al-Quran Sesi Pengajian 2016/2019 di Dewan Mukhtar Darul Quran pada 3 Mei 2016.

Majlis yang bermula pada jam 8:15 pagi dimulakan dengan sesi pendaftaran. Kemudian majlis diteruskan dengan taklimat kepada ibu bapa oleh Ketua Penolong Pengarah Hal Ehwal Pelajar, Us. Kamarul Saman Bin Yaacob.

Majlis perasmian dimulakan kira-kira jam 11:35 pagi dimulai dengan bacaan al-Quran oleh pelajar Pensijilan Jakim-UIAM Semester Tiga, saudara Muhamad Izzat Bin Mukhali. Selepas ucapan aluan dan perasmian oleh Dato' Haji Razali, siswa siswi baru dikehendaki melafazkan ikrar yang merupakan akujanji para pelajar untuk menjadi orang yang beriman, beramal soleh serta berakhlak mulia.

Di samping itu, siswa siswi juga berjanji untuk bersungguh-sungguh dalam pembelajaran dan semua aktiviti yang dianjurkan oleh Darul Quran sehingga tamat tempoh pengajian yang ditetapkan.

Majlis ditamatkan dengan bacaan doa selepas penyerahan siswa siswi baru oleh ibu bapa kepada Dato' Haji Razali, Pengarah dan Pendaftar Darul Quran sebagai suatu simbolik

kepercayaan ibu bapa dalam menyerahkan anak-anak mereka untuk dididik serta ditarbiyah oleh Darul Quran.



*Nota : TKPPI bersalam dengan waris pelajar sebagai simbolik kepada penerimaan sebagai warga pelajar Darul Quran.*

## **MINGGU ORIENTASI PELAJAR BARU PROGRAM DIPLOMA TAHFIZ AL-QURAN**

### **Transkem Bentuk Sahsiah Dan Peribadi Pelajar**

Darul Quran telah menerima seramai 251 orang pelajar baru untuk mengikuti program Diploma Tahfiz al-Quran pada 3 Mei yang lalu. Kesemua pelajar yang telah mendaftar kemudiannya mengikuti program sesi suai kenal yang dikenali sebagai Program Transformasi Kecemerlangan Minda (TRANSKEM) yang diadakan selama lima hari bermula 3 hingga 7 Mei 2015 di Kompleks Darul Quran Jakim, Kuala Kubu Bharu dan kawasan sekitar.

Sepanjang program ini, pelajar-pelajar telah didedahkan dengan suasana pembelajaran di Darul Quran terutama perkara-perkara yang berkaitan dengan teknik pengajian, kaedah hafazan dan lain-lain. Selain itu para pelajar juga dilatih agar bersedia menjadi huffaz dan menjalin ukhuwwah yang mantap antara satu sama lain.

Beberapa aktiviti Latihan Dalam Kumpulan (LDK) juga telah diadakan bertujuan merapatkan silaturrahim antara para peserta dan fasilitator. Para peserta juga didedahkan dengan pelbagai aktiviti luar seperti sukan dan program kembara. Apa yang menarik pada kali ini, para pelajar berpeluang berkayak di sekitar tasik Darul Quran sebagai mengisi salah satu aktiviti dalam slot kembara.

Pengarah Darul Quran, Dr. Haji Nordin Bin Ahmad ketika berucap dalam Majlis Penutup menyatakan program Transkem yang diadakan di Darul Quran diharap dapat memberi semangat kepada pelajar untuk menghafaz al-Quran sepanjang pengajian mereka. Selain itu, setiap pelajar perlu mempunyai mental yang kuat dan sikap bersungguh-sungguh sewaktu belajar di Darul Quran.



*Nota : Antara aktiviti yang diadakan sepanjang TRANSKEM.*

## **PERSIDANGAN PENGETUA-PENGETUA MTQN KALI KE-31 DI ILIM, BANGI**

Persidangan Pengetua-Pengetua Maahad Tahfiz al-Quran Negeri (MTQN) Peringkat Kebangsaan kali ke-31 telah berjaya diadakan pada 12 Mei 2016 bertempat di Institut Latihan Islam Malaysia (ILIM), Bangi. Persidangan pada kali ini merupakan anjuran Darul Quran Jakim.

Persidangan ini diadakan bertujuan untuk menjadi *platform* atau medan perbincangan serta perkongsian buah fikiran antara Darul Quran dengan ketua-ketua institusi tahfiz yang bekerjasama dengan Darul Quran dalam menjalankan program Diploma Tahfiz Al-Quran Wal Qiraat. Mengambil kira dasar penjaminan kerajaan pada tahun ini, persidangan ini diadakan dalam suasana yang sederhana tetapi mencapai objektif.

Persidangan ini telah dipengerusikan oleh Pengarah Darul Quran, Dr. Haji Nordin Bin Ahmad dan dirasmikan oleh Timbalan Ketua Pengarah Pembangunan Insan Jakim, Dato' Haji Razali Bin Shahabudin. Beliau yang dalam ucapan perasmiannya telah mengucapkan tahniah kepada MTQN yang menjadi rakan strategik Darul Quran.

Sementara itu, Dr. Haji Nordin dalam ucapan aluannya ketika mempengerusikan persidangan tersebut turut mengalu-alukan kehadiran Pengetua Institut Tahfiz Al Quran Negeri Sembilan (ITQAN), Haji Zamani Bin Haji Ibrahim yang baru menggantikan Haji Shafie Bin Haji Shaari yang telah berpindah ke Jabatan Agama Islam Negeri Sembilan. Dr. Haji Nordin juga turut merakamkan ucapan jutaan terima kasih kepada Haji Shafie atas komitmen yang telah diberikan sepanjang bergelar Pengetua ITQAN dan berdasarkan pengalaman mempengerusikan persidangan ini, Haji Shafie tidak pernah terkecuali daripada menghadirkan diri.

Pada kali ini, persidangan telah membahaskan beberapa kertas iaitu:

1. Kertas Kaedah Pelaksanaan Pengajaran & Penilaian Kursus Hifz Al-Quran Tahriri Darul Quran yang telah dibentang oleh Ketua Penolong Pengarah Pengajian Darul Quran, Us. Mohamad Rahim Bin Mohammed Abdul Rahman.
2. Kertas Laporan Keputusan Peperiksaan Diploma Semester 2, 4 & 6 Darul Quran bagi tahun 2016 yang telah dibentang oleh Timbalan Pengarah Cawangan Akademik Darul Quran, Ust. Azizah Binti Che Hassan.

3. Kertas Perkongsian Pintar Amalan Terbaik (*Best Practice*) yang telah dibentang oleh Ketua Pegawai Eksekutif Maahad Tahfiz Al Quran Negeri Pahang, Dato' Haji Zulkifle Bin Haji Ali al-Hafiz.
4. Kertas Laporan Penaziran Akademik Ke Atas MTQN Bil. 1/2016 dan Kertas Laporan Keputusan Mesyuarat Lembaga Darul Quran Kali Ke-29 Berkaitan MTQN yang telah dibentang oleh Timbalan Pengarah Cawangan Kualiti Pendidikan Tahfiz Darul Quran, Us. Mohamad Zamri Bin Mohamed Shapik.
5. Kertas Makluman Pelaksanaan MQA MTQN Bagi Program Diploma Tahfiz Al-Quran & Qiraat Darul Quran dan Kertas Makluman Sambutan Jubli Emas Darul Quran yang telah dibentang oleh Ketua Pengarah Pengarah Cawangan Kualiti Pendidikan Tahfiz Darul Quran, Ust. Kasumawati Binti Kasim.
6. Kertas Makluman Perkhidmatan Unit Kaunseling Psikologi & Kerjaya Darul Quran yang telah dibentang oleh Ketua Pengarah Pengarah Hal Ehwal Pelajar, Us. Kamarul Saman Bin Yaacub.



*Nota : Pengetua-pengetua Maahad Tahfiz Al-Quran Negeri bergambar kenangan selepas menghadiri Persidangan Pengetua-Pengetua Maahad Tahfiz Al-Quran.*

## **MAJLIS KHATAM HAFAZAN PELAJAR PROGRAM PENSIJILAN TAHFIZ AL-QURAN**

### **107 Bakal Huffaz Profesional Dirai Dalam Majlis Khatam**

Seramai 90 orang pelajar semester akhir program Pensijilan Jakim-UIAM dan 22 orang pelajar program Pensijilan Jakim-Uniten telah diraikan dalam Majlis Khatam Hafazan Al-Quran Pelajar Program Pensijilan Tahun 2016/1437. Majlis tradisi ini diadakan untuk meraikan para pelajar yang telah berjaya menamatkan hafazan al-Quran 30 juzu' mengikut sukatan hafazan yang telah ditetapkan oleh Darul Quran.

Majlis gilang-gemilang ini telah dirasmikan oleh Orang Besar Daerah Hulu Selangor, Dato' Haji Aman Shah Bin Mohd Shahr. Beliau yang dalam ucapan perasmiannya telah merakamkan ucapan syabas dan tahniah kepada para pelajar yang telah berjaya menamatkan hafazan al-Quran 30 juzu'. Beliau juga secara peribadi telah melahirkan rasa bertuah kerana di Hulu Selangor ini terdapat sebuah institusi tahfiz al-Quran terulung di Malaysia yang menjadi tumpuan pelajar termasuk juga pelajar-pelajar dari negara-negara serantau.

Menurut beliau lagi, masyarakat di sekitar Hulu Selangor akan mendapat manfaat serta barakah dengan keberadaan Darul Quran di Hulu Selangor melalui program-program yang dilaksanakan oleh Darul Quran seperti kelas bacaan al-Quran kepada masyarakat sekitar Hulu Selangor, program pengimarahannya masjid-masjid serta surau-surau sekitar Hulu Selangor dengan menjadi imam tarawih dan sebagainya.

Sebelum itu, Pengarah Darul Quran, Dr. Haji Nordin Bin Ahmad dalam ucapan aluannya telah melahirkan kesyukuran dan berterima kasih juga kepada semua hadirin di atas kesudian hadir ke majlis yang kedua terbesar bagi para pelajar Darul Quran selepas Majlis Istiadat Konvokesyen. Beliau juga telah memperingatkan para pelajar tentang tanggungjawab yang besar yang terpaksa dipikul oleh pelajar dalam bidang profesional serta dalam masa yang sama merupakan penghafaz al-Quran.

Majlis ini telah dimulakan dengan bacaan khatam al-Quran dari Surah al-Dhuha hingga al-Nas secara hafaz oleh semua siswa yang diraikan dan dipimpin oleh Us. Muhammad Fairulnaim Bi Yaakub, Us. Ahmad Hassan Bin Ismail dan Us. Mohd Taufik Bin Abu Hasan.



*Nota : Pelajar memperdengarkan bacaan hafazan al-Quran ketika Majlis Khatam Hafazan Al-Quran Program Pensijilan Tahfiz Al-Quran.*

### **MAJLIS KHATAM TADARUS DAN IFTAR JAMAIE DARUL QURAN 2016**

Darul Quran Jakim telah mengadakan Majlis Khatam Tadarus Dan Iftar Jamaie di Pusat Islam Darul Quran pada 28 Jun 2016. Seramai kira-kira 1,000 orang yang hadir ke majlis ini terdiri daripada dif-dif jemputan, kakitangan Darul Quran serta keluarga dan pelajar-pelajar Darul Quran.

Majlis ini telah dirasmikan oleh Pengarah Bahagian Pembangunan Insan Jakim, Hajjah Zawanah Binti Muhammad mewakili Ketua Pengarah Jakim. Beliau yang dalam ucapan perasmiannya mengharapkan agar pelajar-pelajar Darul Quran menampilkan kewibawaan sebagai seorang pelajar yang hebat bukan sahaja dalam aspek keilmuan dan hafazan al-Quran, malah termasuk aspek penampilan diri.

Dalam majlis ini juga, Darul Quran turut mengambil kesempatan mengadakan perasmian dokumen baru MS ISO 9001:2015 Darul Quran yang disempurnakan oleh Hajjah Zawanah. Proses pembinaan dokumen baru MS ISO 9001:2015 Darul Quran telah bermula sejak awal tahun 2016 dengan diadakan beberapa siri bengkel oleh pihak urusetia.

Pelbagai aktiviti telah diadakan dalam majlis ini antaranya Majlis Khatam Tadarus al-Quran yang ditakhtimkan oleh pelajar-pelajar Darul Quran. Selain itu, diadakan pelancaran dokumen baru MS ISO 9001:2015 Darul Quran Jakim, penyampaian hadiah kepada pemenang Pertandingan Hafazan al-Quran Kategori 1-30 Juzu' Ihya' Ramadhan, Solat Maghrib, Solat Isya' dan Solat Tarawih berjemaah. Tajaan Pertandingan Hafazan al-Quran Kategori 1-30 Juzu' Ihya' Ramadhan 2016 telah disumbangkan oleh Pengasas Ramly Burger, Dato' Paduka Haji Ramly Bin Mokni.

Majlis Khatam Tadarus Dan Iftar Jamaie ini turut dihadiri oleh wakil Kumpulan Ramly Mokni (Ramly Burger), Pengurus Besar, En. Mohammad Fuad Bin Abd Rashid dan Eksekutif Halal, Us. Muzaffar bagi mewakili Dato' Paduka Haji Ramly Bin Mokni.



*Nota : Sebahagian peserta Pertandingan Tilawah Hafazan Al-Quran bergambar bersama Hajjah Zawanah, Pengarah Darul Quran dan wakil Kumpulan Ramly Mokni (Ramly Burger).*

### **MESYUARAT LEMBAGA DARUL QURAN KALI KE-30 BERSIDANG DI ILIM BANGI**

Mesyuarat Lembaga Darul Quran kali ke-30 telah berlangsung pada hari Khamis, 28 Julai 2016 bertempat di Bilik Mesyuarat Abu Bakar As-Siddiq, Blok Akademik A, Institut Latihan Islam Malaysia (ILIM) Bangi.

Mesyuarat ini telah dipengerusikan oleh Ketua Pengarah Jakim, Tan Sri Dato' Haji Othman Bin Mustapha. Beliau yang dalam ucapan aluannya mengucapkan terima kasih kepada semua Ahli Lembaga Darul Quran kerana sudi hadir ke mesyuarat tersebut walaupun dalam kesibukan tugas masing-masing. Beliau juga telah berbesar hati menjemput kesemua ahli lembaga Darul Quran untuk menghadiri program-program sepanjang Konvokesyen Kali Ke-25 dan Sambutan Jubli Emas Darul Quran seperti Ekspo Konvokesyen pada 4-7 Ogos 2016, Majlis Istiadat Konvokesyen pada 6 Ogos 2016, Siaran Langsung Forum Perdana Hal Ehwal Islam pada 4 Ogos 2016 dan Simposium Tahfiz al-Quran Peringkat Antarabangsa pada 22-24 November 2016 yang akan diadakan di ILIM.

Mesyuarat yang dihadiri oleh tujuh orang Ahli Lembaga Darul Quran ini telah membincangkan berkenaan empat kertas cadangan berkaitan Kertas Laporan Perakuan Keputusan Peperiksaan Akhir Pensijilan Tahfiz Al-Quran Semester Tiga Jakim-UIAM bagi Tahun 2016, Kertas Cadangan Pencalonan Anugerah Kecemerlangan Sempena Istiadat Konvokesyen Darul Quran Kali Ke-25, Kertas Cadangan Menjenamakan Semula Program Sijil Tahfiz Orang Kelainan Upaya Masalah Penglihatan (OKUMP) Kepada Sijil Asas Tahfiz Al-Quran Darul Quran Jakim dan Kertas Cadangan Lagu Rasmi Darul Quran Jakim.

Selain itu, mesyuarat juga turut membincangkan berkenaan Kertas Permohonan Cadangan Program Pensijilan Tahfiz Al-Quran Darul Quran-Universiti Teknikal Malaysia Melaka (UTeM) dan dua lagi kertas makluman iaitu Kertas Makluman Mengadakan Majlis Konvokesyen Darul Quran Jakim Kali Ke-25 & Sambutan Jubli Emas Darul Quran serta Kertas Makluman Penganugerahan Tokoh Huffaz Sempena Sambutan Jubli Emas Darul Quran Jakim.

Ahli-ahli Lembaga Darul Quran yang hadir dalam mesyuarat pada sesi kali ini ialah Prof. Dato' Dr. Sidek Bin Baba, Datuk Dr. Zulkifli Bin Mohamad Al-Bakri, Dato' Haji Razali Bin Shahabudin, Datin Dr. Roslina Binti Ahmad Mokhtar, En. Masri Bin Razali, Hajjah Zawanah Binti Muhammad, Tuan Razali Bin Ariffin dan Pengarah Darul Quran, Dr. Haji Nordin Bin Ahmad selaku Setiausaha.

Turut hadir dalam Mesyuarat Lembaga ini ialah Ketua Jabatan Al-Quran Dan Hadith Universiti Malaya, Dr. Monica@Munirah Binti Abd Razak, Penyelaras Pelajar Luar Negara dan Program Tahfiz, Pusat Asasi Universiti Islam Antarabangsa Malaysia (UIAM), En. Murshid Bin Kassim, Ketua Unit Pemerkasaan Pengajian Kementerian Pendidikan Malaysia, En. Muhammad Shafie Bin Haji Ismail, komposer lagu rasmi (cadangan) Darul Quran, En. Suhaimi Bin Saad dan 18 orang pegawai Darul Quran.



*Nota : Tan Sri Othman bin Mustapha mempengerusikan Mesyuarat Ahli Lembaga Darul Quran Kali Ke-30 yang berlangsung di ILIM, Bangi*

**SIARAN LANGSUNG FORUM “BICARA INI BICARA AL-QURAN” DI DARUL QURAN JAKIM**

Darul Quran Jakim dengan kerjasama Radio Televisyen Malaysia (RTM) telah menganjurkan Forum Perdana Hal Ehwal Islam bersempena Ekspo Konvokesyen Darul Quran Jakim Kali Ke-25 yang bersiaran secara langsung dari Dewan Mukhtamar Darul Quran Jakim, Kuala Kubu Bharu pada 4 Ogos 2016.

Forum ini diadakan bertujuan mendedahkan warga Darul Quran dan penonton yang hadir terdiri daripada masyarakat Hulu Selangor dengan diskusi ilmu-ilmu kerohanian sebagai bekalan jati diri di samping ianya merupakan salah satu acara yang memeriahkan lagi ekspo konvokesyen pada tahun ini. Tajuk forum ini ialah “Bicara Ini Bicara Al-Quran” yang dihoskan oleh Ustaz Mohd Hariri Bin Mohamad Daud dari Unit Indeks Syariah Malaysia dan panel forum pertama ialah Imam Besar Masjid Negara, Tan Sri Dato’ Haji Syaikh Ismail Bin Haji Muhammad serta Pensyarah Universiti Islam Malaysia (UIAM), Ustaz Abdullah Bukhari Bin Abdul Rahim selaku ahli panel kedua.

Antara perkara yang dibincangkan dalam forum ini ialah berkaitan kelebihan menghafaz al-Quran. Ianya merangkumi aspek rohani, mental, fizikal, dunia serta akhirat sehinggakan kadangkala kelebihan tersebut dapat dilihat di dunia lagi. Sebagai contoh di negara Malaysia, pelbagai insentif dan biasiswa yang ditawarkan kepada penghafaz-penghafaz al-Quran. Manakala dari aspek ukhrawi pula, Nabi Muhammad SAW telah bersabda yang bermaksud: *“Barangsiapa yang membaca satu huruf dari Kitabullah, maka dia akan mendapat kebaikan (pahala) dan pahalanya akan dilipatgandakan sebanyak 10 kali ganda. Aku (Nabi SAW) tidak mengatakan bahawa Alif Lam Mim itu satu huruf tetapi Alif itu satu huruf, Lam itu satu huruf dan Mim itu satu huruf.”*

Selain itu, Tan Sri Dato’ Haji Syaikh Ismail juga telah menasihatkan kepada ‘orang muda’, dalam keghairahan hendak menggalakkan masyarakat untuk cintakan al-Quran, ianya perlulah dilaksanakan dengan cara yang berhikmah. Antara perkara yang perlu dititikberatkan terlebih dahulu ialah dengan memantapkan diri sendiri dengan ilmu kerana masyarakat akan lebih mudah menerima pandangan orang-orang yang berstatus ‘hebat’. Beliau turut mengambil kesempatan menasihatkan supaya umat Islam mengubah cara hidup. Sebelum membaca surat khabar atau menggunakan telefon bimbit pada waktu pagi, bacalah al-Quran terlebih dahulu.

Turut hadir dalam forum ini ialah Orang Besar Daerah Hulu Selangor, Dato' Haji Aman Shah Bin Mohd Shahar, ADUN Batang Kali, Datuk Haji Mat Nadzari Bin Ahmad Dahlan, Pengarah Bahagian Media Jakim, Dato' Haji Mustafa Kamal Bin A. Razak, Pengarah Bahagian Dakwah Jakim, Dato' Haji Ali Bin Mohammed dan Pengarah Darul Quran.



*Nota : Panelis Forum "Bicara Ini Bicara Al-Quran"*

## **ISTIADAT KONVOKESYEN KALI KE-25 DAN PERASMIAN SAMBUTAN JUBLI EMAS DARUL QURAN JAKIM**

### **Istiadat Konvokesyen Darul Quran Kali Ke-25 Disambut Meriah Bersama Majlis Perasmian Sambutan Jubli Emas Darul Quran Jakim**

Menteri Di Jabatan Perdana Menteri, YB Mejar Jeneral Dato' Seri Jamil Khir Bin Haji Baharom (B) telah berkenan untuk merasmikan Istiadat Konvokesyen Kali Ke-25 Dan Perasmian Sambutan Jubli Emas Darul Quran Jakim yang berlangsung pada 6 Ogos 2016. Majlis yang berlangsung penuh gilang-gemilang itu telah diadakan di Dewan Mukhtamar Darul Quran, Kuala Kubu Bharu, Selangor.

Pada istiadat konvokesyen kali ini, seramai 397 orang graduan telah menerima Diploma Tahfiz al-Quran manakala seramai 113 graduan pula menerima Sijil Tahfiz al-Quran. Selain itu, 113 graduan yang tamat Program Ijazah Sarjana Muda al-Quran dan Sunnah Dengan Kepujian USIM-Darul Quran turut diraikan pada majlis yang sama. Penganugerahan Sijil dan Diploma ini telah disempurnakan oleh Ketua Pengarah Jakim, Tan Sri Dato' Haji Othman Bin Mustapha.

Dalam ucapan perasmian yang disampaikan oleh YB Mejar Jeneral Dato' Seri Jamil Khir Bin Haji Baharom (B), beliau telah mengucapkan tahniah kepada semua graduan yang telah berjaya menamatkan pengajian mereka di Darul Quran. Di samping itu, beliau juga mengharapkan agar semua graduan memainkan peranan dan tanggungjawab dalam pembangunan negara sesuai dengan perkembangan Darul Quran sebagai sebuah institusi tahfiz yang telah beroperasi sejak 50 tahun yang lalu. Pada ketika ini, graduan tahfiz bukan sahaja terdiri dalam bidang agama sahaja, malah turut melibatkan bidang-bidang yang lain seperti bidang kedoktoran, kejuruteraan dan sebagainya.

Majlis yang disambut bersama dengan Majlis Perasmian Sambutan Jubli Emas Darul Quran ini telah menobatkan dua orang insan terpilih sebagai penerima Anugerah Tokoh Huffaz. Imam Besar Masjid Negara, Tan Sri Dato' Haji Syaikh Ismail Bin Haji Muhammad telah dinobatkan sebagai penerima Anugerah Tokoh Huffaz Perdana manakala al-Fadhil Ustaz Ali Badri Bin Abdul Majid telah dinobatkan sebagai penerima Anugerah Tokoh Huffaz Khas. Penerima Anugerah Tokoh Huffaz Perdana telah menerima wang tunai sebanyak RM20000, sijil penganugerahan dan medal sementara penerima Anugerah Tokoh Huffaz Khas pula menerima wang tunai sebanyak RM5000, sijil penganugerahan serta medal. Dalam Majlis Perasmian Sambutan Jubli Emas ini juga, YB Mejar Jeneral Dato' Seri Jamil Khir Bin Haji Baharom (B) telah merasmikan pelancaran buku Jubli Emas Darul Quran Jakim.

Turut hadir dalam majlis ini ialah Timbalan Menteri Di Jabatan Perdana Menteri, YB Senator Dato' Dr. Asyraf Wajdi Bin Dato' Dusuki, ADUN Batang Kali, Datuk Mat Nadzari Bin Ahmad Dahlan, Mufti Wilayah Persekutuan, Datuk Dr. Zulkifli Bin Mohamad Al-Bakri, Timbalan-Timbalan Ketua Pengarah Jakim, Ahli-Ahli Lembaga Darul Quran, Ahli-Ahli Jawatankuasa Penasihat Akademik Darul Quran, Pengarah-Pengarah Bahagian Jakim, Mantan-Mantan Pengetua/Pengarah Darul Quran Jakim dan Pengetua-Pengetua Maahad Tahfiz Al-Quran Negeri (MTQN).



## **EKSPLO KONVOKESYEN DARUL QURAN**

### **Bahang Istiadat Konvokesyen Kali Ke-25 Telah Bermula Dengan Perasmian Ekspo Konvokesyen Darul Quran**

Pada 4 Ogos 2016, Darul Quran telah mengadakan Majlis Perasmian Ekspo sempena Majlis Istiadat Konvokesyen Kali Ke-25 yang berlangsung dalam suasana sederhana tetapi istimewa kerana Majlis Istiadat Konvokesyen pada tahun ini disambut bersama Majlis Perasmian Sambutan Jubli Emas Darul Quran Jakim. Majlis yang disempurnakan oleh Timbalan Ketua Pengarah Pembangunan Insan Jakim, Dato Haji Razali Bin Shahabudin diserikan lagi dengan persembahan dikir barat dan persembahan silat oleh para pelajar Darul Quran.

Beliau yang dalam ucapan perasmiannya telah menyentuh beberapa perkara antaranya ialah penganjuran ekspo seperti ini boleh dijadikan platform untuk mengeratkan lagi hubungan antara Darul Quran dengan masyarakat di Hulu Selangor di samping dapat memperkenalkan Darul Quran kepada orang awam khususnya berkaitan program-program yang sedang dijalankan oleh Darul Quran. Selain itu, beliau juga telah mengambil kesempatan untuk menasihatkan para pelajar agar menyeimbangkan antara pelajaran serta aktiviti ko-kurikulum bertepatan dengan keterlibatan pelajar dalam penganjuran majlis Ekspo dan Istiadat Konvokesyen ini.

Ekspo yang akan berlangsung selama empat hari tiga malam ini akan bermula pada 4-7 Ogos 2016. Pada ekspo kali ini, Darul Quran telah mengaturkan pelbagai acara bagi menarik minat orang ramai untuk berkunjung ke tapak ekspo antaranya ialah Karnival Sukan Jemputan yang melibatkan penyertaan dari IPT-IPT/MTQN-MTQN seperti pertandingan futsal, bola sepak, sepak takraw, bola jaring dan bola tampar selain sukan rakyat yang boleh disertai oleh masyarakat awam.

Selain itu, pada ekspo kali ini, Darul Quran turut mengadakan Siaran Langsung Forum Perdana Hal Ehwal Islam dengan kerjasama RTM TV1, Malam Kesenian Islam yang menampilkan kumpulan nasyid Rabbani, Pertandingan Memancing yang menawarkan keseluruhan hadiah sebanyak RM24,000, Pemeriksaan Kesihatan, Derma Darah, Klinik al-Quran, Lailatul Quran, Kembara Persatuan Nissan Grand Livina (PNGL) Ke Kampus Darul Quran, Pameran Motosikal Berkuasa Tinggi, aktiviti berkayak, memanah, berkuda serta banyak lagi acara yang menarik yang disediakan oleh pihak pengajur ekspo pada tahun ini.

Majlis perasmian ekspo ini berakhir dengan bacaan doa seterusnya lawatan Dato Haji Razali, diiringi Pengarah Darul Quran dan pegawai-pegawai kanan Darul Quran ke tapak-tapak pameran serta gerai-gerai jualan.



*Nota : Persembahan pelajar di Malam Kesenian Islam sempena Ekspo Konvokensyen Darul Quran.*

**MAJLIS PENDAFTARAN PELAJAR BARU PROGRAM IJAZAH SARJANA MUDA  
QURAN & SUNNAH DENGAN KEPUJIAN USIM-DQ**

**45 Mahasiswa Mendaftar Program Ijazah USIM-DQ**

Darul Quran telah menerima seramai 45 mahasiswa baru bagi mengikuti program Ijazah Sarjana Muda Quran & Sunnah Dengan Kepujian USIM di Darul Quran bagi Sesi Akademik 2016-2019. Pengambilan pada sesi kali ini melibatkan 23 orang siswa dan 20 orang siswi. Kesemua siswa siswi ini telah diraikan pada Majlis Sambutan Siwa Siswi Baru USIM-DQ pada 5 September 2016 yang telah dirasmikan oleh Pendaftar Darul Quran, Us. Haji Mohd Norizan Bin Abd Ghani.

Dalam ucapan perasmiannya, Us. Haji Mohd Norizan mengucapkan tahniah kepada semua mahasiswa yang terpilih untuk melanjutkan pelajaran dalam bidang Quran dan Sunnah dengan kerjasama Darul Quran bersama USIM. Beliau turut menggesa kepada siswa siswi baru agar memberi sepenuh komitmen sepanjang pengajian di Darul Quran di samping terus konsisten dalam mengekalkan hafazan.

Program kerjasama antara USIM dan Darul Quran ini telah dilaksanakan bermula pada tahun 2009 dan lima kumpulan telah pun bergraduasi sejak program ini diperkenalkan. Pelajar-pelajar yang diterima untuk mengikuti program ini mestilah terdiri daripada bekas graduan Diploma Tahfiz Al-Quran Wal Qiraat sama ada belajar di kampus Darul Quran Kuala Kubu Bharu mahupun di Maahad-Maahad Tahfiz Al-Quran Negeri. Ketika ini, seramai 172 orang graduan telah dihasilkan melalui program ini.

Majlis diakhiri dengan bacaan ikrar yang dilafazkan oleh siswa siswi baru yang diketuai oleh Saudara Afiq Fakhri Bin Zulkifli seterusnya jamuan makan. Para siswa siswi baru ini akan mengikuti program Transformasi Kecemerlangan Minda (TRANSKEM) yang akan dijalankan bermula 5 hingga 7 September 2016.



*Nota : Pelajar baru program Ijazah Sarjana Muda Quran & Sunnah Dengan Kepujian USIM bergambar selepas sesi pendaftaran dan taklimat.*

## **KURSUS PENSIJILAN PENGAJARAN & PEMBELAJARAN KERJASAMA DQ-UPSI**

### **Timbalan Ketua Pengarah Pembangunan Insan Jakim Yang Baru Merasmikan Kursus Pensijilan Pengajaran & Pembelajaran Di ILIM**

Dalam usaha meningkatkan kompetensi para pensyarah, Darul Quran Jakim telah bekerjasama dengan Universiti Pendidikan Sultan Idris (UPSI) dalam menganjurkan Kursus Pensijilan Pengajaran & Pembelajaran yang bermula pada 10-25 Oktober 2016. Kursus selama 12 hari ini telah diadakan di Institut Latihan Islam Malaysia (ILIM) Bangi.

Kursus ini telah dirasmikan oleh Haji Paimuzi Bin Yahya selaku Timbalan Ketua Pengarah Pembangunan Insan Jakim yang baru dilantik berkuatkuasa pada 5 Oktober 2016. Ini merupakan antara tugas awal beliau selepas menjawat jawatan selaku TKPPI Jakim. Beliau telah menyatakan harapan agar semua peserta kursus dapat menggunakan peluang ini dengan sebaik-baiknya dan dapat memberikan tumpuan sepanjang tempoh kursus berjalan. Sudah semestinya dua perkara yang harus dicapai selepas selesai berkursus iaitu penambahan ilmu serta kemahiran. Seajar dengan hasrat Darul Quran yang hendak dinaiktaraf, beliau juga menyatakan harapan agar para pensyarah Darul Quran serta Maahad-Maahad Tahfiz Al-Quran Negeri (MTQN) dapat meningkatkan lagi kemahiran dari sudut pengajaran dan pembelajaran.

Terdahulu, Pengarah Darul Quran, Dr. Haji Nordin Bin Ahmad dalam ucapan aluannya telah mengambil kesempatan merakamkan ucapan tahniah kepada Haji Paimuzi atas pelantikan beliau sebagai TKPPI yang baru. Beliau telah menjelaskan kepada peserta-peserta kursus tentang objektif kursus ini diadakan yang bertujuan untuk memantapkan kemahiran pembelajaran dan pengajaran serta kepimpinan pensyarah dalam bidang akademik. Selain itu, kursus ini juga merupakan persediaan latihan pembangunan staf bagi memenuhi keperluan Agensi Kelayakan Malaysia (MQA) di samping dapat memperkasakan tahap profesionalisme serta kompetensi pensyarah dari sudut penambahbaikan mutu penyampaian pembelajaran dan pengajaran para pensyarah.

Kursus ini dijalankan berdasarkan tiga peringkat iaitu kursus bersemuka yang diadakan selama 12 hari bekerja yang melibatkan beberapa modul, tugas individu atau kumpulan yang akan dilakukan oleh peserta kursus dan diserahkan semula kepada pihak urusetia satu

bulan dari tarikh soalan tugas diberikan dan pencerapan pengajaran ke atas peserta kursus yang akan dilakukan sebanyak dua kali oleh pensyarah berpengalaman dari Universiti Pendidikan Sultan Idris (UPSI).

Turut hadir dalam majlis ini ialah Penyelaras Unit Pembangunan Profesional & Bakat UPSI, Prof. Madya Dr. Azlan Kamari pegawai-pegawai kanan Darul Quran dan wakil dari UPSI. Kursus Pensijilan Pengajaran & Pembelajaran ini disertai oleh 14 orang pensyarah Darul Quran dan enam orang pensyarah MTQN iaitu dari Maahad Tahfiz Al-Quran ADDIN Tapah, MTQN Pahang, MTQN Perak, MTQN Kelantan, Institut Al-Quran Darul Aman (IQDAR) Kedah, MTQN Sabah dan MARSAH Johor.



### **LAWATAN MAHABBAH DARI KUIN KE DARUL QURAN**

Pada 4 November 2016, Darul Quran telah menerima kunjungan mesra delegasi daripada Kolej Universiti Insaniah (KUIN) Kuala Ketil, Kedah. Delegasi KUIN ini terdiri daripada Dekan, Timbalan Dekan dan pensyarah-pensyarah daripada Kuliyyah Al-Quran & Sunnah.

Delegasi KUIN seramai enam orang telah diketuai oleh Dekan Kuliyyah Al-Quran & Sunnah, Ustaz Mat Rani Bin Abdul Manaf. Diikuti oleh Ustaz Abdul Hakim Bin Mahadzir selaku Timbalan Dekan, Dr. Mohd Sholeh Bin Sheh Yusuff selaku Pensyarah Kanan, Dr. Ali Omar Salem Balagem selaku Pensyarah, Ustaz Mohamad Alwi Bin Ab Rahman selaku Pegawai Pendidikan Pengajian Tinggi dan Ustaz Mohd Affif Bin Othman selaku Pegawai Perkhidmatan Pendidikan KUIN. Sementara dari pihak tuan rumah, Pengarah Darul Quran sendiri, Dr. Haji Nordin Bin Ahmad telah mengetuai pegawai-pegawai Darul Quran dalam meraikan para tetamu dari KUIN.

Dalam ucapan Dr. Haji Nordin, beliau telah mengalu-alukan kehadiran dan mengucapkan jutaan terima kasih kepada delegasi KUIN kerana berkenan untuk menziarahi Darul Quran bagi melihat ruang-ruang kerjasama yang boleh dijalinan antara Darul Quran dan KUIN. Sesi lawatan ini telah dimulakan dengan taklimat berkenaan Darul Quran yang telah disampaikan oleh Penolong Pengarah Kanan Unit Komunikasi Korporat & Pengantarabangsaan, Ustaz Shahrulkarnain Bin Mohamad Nazir. Beliau telah menerangkan kepada para tetamu berkenaan program-program pengajian yang sedang dijalankan oleh Darul Quran sekarang. Dimulai daripada program Ijazah Sarjana Muda Pengajian Quran & Sunnah USIM-DQ, program Diploma Tahfiz Al-Quran Wal Qiraat serta kerjasama-kerjasama Darul Quran bersama 14 buah Maahad-Maahad Tahfiz Al-Quran Negeri, Program Pensijilan Jakim-UIAM, Jakim-UNITEN, Jakim-CUCMS, Jakim-UTeM hinggalah kepada program Sijil Tahfiz Malaysia (STM) yang ditawarkan kepada masyarakat awam yang menghafaz al-Quran.

Majlis ini berakhir selepas pertukaran cenderahati dari kedua-dua pihak dan sesi bergambar. Pegawai-pegawai Darul Quran yang turut hadir dalam majlis ini ialah Pendaftar, Timbalan Pengarah Akademik, KPP Cawangan Kualiti Pendidikan Tahfiz, KPP Hal Ehwal Pelajar, Ketua Jabatan Pengajian Tahfiz, Ketua Jabatan Pengajian Al-Quran & Qiraat dan Ustaz Mohd Aishamudin Bin Samsungei serta Ustaz Mohd Bakri Bin Hashim selaku urusetia.



*Nota : Sebahagian tetamu dari KUIN sedang mendengar taklimat daripada pegawai Darul Quran.*

### **LAWATAN KERJA YB SETIAUSAHA KERAJAAN NEGERI, NEGERI SEMBILAN KE DARUL QURAN**

Dalam usaha memartabatkan pendidikan tahfiz di Malaysia, Darul Quran Jakim telah menerima lawatan kerja delegasi daripada kerajaan Negeri Sembilan pada 18 November 2016. Delegasi ini telah diketuai oleh Setiausaha Kerajaan Negeri (SUK) Negeri Sembilan, Dato' Haji Mat Ali Bin Hassan. Lawatan kerja ini diadakan bertujuan untuk mendapatkan sedikit sebanyak maklumat dari Darul Quran berkenaan usaha-usaha menaiktaraf pendidikan tahfiz ke peringkat yang lebih tinggi.

Delegasi kerajaan Negeri Sembilan seramai lima orang ini turut dihadiri oleh Pengarah Jabatan Hal Ehwal Agama Islam Negeri Sembilan (JHEAINS), Dato' Haji Selamat Bin Paigo, Pengetua Institut Al-Quran Negeri Sembilan (ITQAN), Haji Zamani Bin Ibrahim, Penolong Pengarah Pendidikan Unit Pengajian Tinggi & Pembangunan Modal Insan JHEAINS, Ustaz Amir Intizam Bin Othman dan Encik Ahmad Muzhaffar Bin Awaludin selaku Pegawai Khas kepada YB SUK Negeri Sembilan. Timbalan Ketua Pengarah Dasar Jakim, Datuk Haji

Nordin Bin Ibrahim telah berkenan untuk mempengerusikan pertemuan antara pihak kerajaan Negeri Sembilan dengan Darul Quran Jakim.

Beliau yang dalam ucapannya telah mengalu-alukan kedatangan para tetamu serta menyampaikan salam Ketua Pengarah Jakim yang tidak dapat hadir bersama kerana terpaksa menghadiri program di Kudat. Manakala ucapan balas pihak tetamu selepas itu telah diberikan sendiri oleh Dato' Haji Mat Ali. Dalam ucapannya, beliau telah menyatakan hasrat kerajaan Negeri Sembilan untuk menaiktaraf ITQAN ke peringkat kolej ataupun kolej universiti. Hasrat semenjak empat tahun lepas ini telah disasarkan untuk dilancarkan proses menaiktaraf bagi kohort pelajar ijazah pertama ITQAN pada tahun hadapan.

Agenda lawatan diteruskan dengan pembentangan berkenaan pengurusan pentadbiran dan akademik Darul Quran serta program-program pengajian yang sedang dijalankan oleh Penolong Pengarah Kanan Unit Komunikasi Korporat & Pengantarabangsaan (UKKP), Ustaz Shahrulkarnain Bin Mohamad Nazir. Pembentangan ini turut diselangseli dengan pertanyaan-pertanyaan dari pihak tetamu dan telah dijawab dengan baik oleh Pengarah Darul Quran, Dr. Haji Nordin Bin Ahmad serta wakil-wakil pengurusan Darul Quran. Berdasarkan hasil perbincangan, kedua-dua pihak bersetuju untuk diadakan perincian kepada beberapa tindakan susulan bagi mencapai objektif lawatan ini.

Majlis berakhir selepas pertukaran cenderahati antara kedua-dua pihak. Wakil Darul Quran yang turut hadir dalam pertemuan ini ialah Ustaz Haji Norizan Bin Abd Ghani selaku Pendaftar, Ustazah Azizah Binti Che Hassan selaku Timbalan Pengarah Akademik serta Ketua-Ketua Penolong Pengarah dan Ketua-Ketua Unit yang berkaitan.



*Nota : Para tetamu merakamkan gambar kenangan selepas mengadakan pertemuan bersama Timbalan Ketua Pengarah Dasar Jakim serta pihak pengurusan Darul Quran.*

## **SIMPOSIUM TAHFIZ AL-QURAN PERINGKAT ANTARABANGSA**

### **Simposium Tahfiz Al-Quran Peringkat Antarabangsa Berakhir Dengan Jayanya**

Darul Quran Jakim telah menganjurkan Simposium Tahfiz Al-Quran Peringkat Antarabangsa yang berlangsung pada 22-24 November 2016 di Institut Latihan Islam Malaysia (ILIM). Program yang diadakan bersempena dengan sambutan Jubli Emas Darul Quran Jakim ini dianjurkan secara bersama dengan *Centre of Quranic Research (CQR)* Universiti Malaya, ILIM dan Yayasan Taqwa.

Sebanyak empat objektif telah digariskan bagi simposium ini iaitu:

1. mewujudkan perkongsian pengalaman dan pandangan berkenaan pengendalian dan pengurusan institusi tahfiz demi kecemerlangan *huffaz*;
2. mencetuskan dapatan baru daripada kalangan pakar dalam bidang tahfiz al-Quran dari pelbagai negara;
3. meluaskan jalinan ukhuwwah dan hubungan strategik antara institusi tahfiz dalam dan luar negara dengan menyediakan ruang perbincangan berkaitan isu-isu global pendidikan tahfiz melalui sesi pertemuan para *huffaz* yang dinamakan sebagai *Ihtifal Huffaz 'Alamiyyah*; dan
4. menjadikan Malaysia sebagai hub pendidikan tahfiz negara yang bertanggungjawab memberi pengiktirafan kepada penghafaz al-Quran dan institusi tahfiz al-Quran.

Simposium ini telah dirasmikan pada 23 November 2016 dan disempurnakan oleh YAB Timbalan Perdana Menteri, Dato' Seri Dr. Ahmad Zahid Bin Hamidi. Turut hadir dalam majlis perasmian tersebut ialah YB Senator Timbalan Menteri Di Jabatan Perdana Menteri, Dato' Dr. Asyraf Wajdi Bin Dato' Dusuki dan Tan Sri Dato' Haji Othman Bin Mustapha selaku Ketua Pengarah Jakim.

YAB Dato' Seri Dr. Ahmad Zahid Bin Hamidi dalam ucapan perasmiannya telah menyatakan atas sambutan yang menggalakkan daripada masyarakat maka kerajaan telah menubuhkan pelbagai institusi tahfiz seperti MRSM Ulul Albab di bawah kendalian Majlis Amanah Rakyat (MARA), Sekolah Agama Bantuan Kerajaan (SABK) Tahfiz dan Sekolah Tahfiz Model Ulul Albab di bawah kendalian Kementerian Pendidikan Malaysia (KPM). Malah komitmen kerajaan terhadap bidang tahfiz tidak terhad sekadar itu, kerajaan juga turut memperkenalkan Kurikulum Bersepadu Tahfiz (KBT) dan Dasar Pendidikan Tahfiz Negara (DPTN). Suatu dasar yang dirangka agar kurikulumnya dapat diselaraskan supaya bersifat

menyeluruh dan tidak hanya tertumpu kepada kecemerlangan dalam bacaan serta hafalan semata-mata, namun ianya menggabungkan dua komponen ilmu iaitu ilmu hafazan al-Quran dengan ilmu-ilmu yang lain, yang mengintegrasikan antara ilmu aqli dan naqli. Dalam ucapan perasmian ini juga, YAB Timbalan Perdana Menteri turut mengumumkan peruntukan pembinaan prasarana bagi menampung kemudahan bangunan pengajian dan penginapan pelajar yang dianggarkan berjumlah RM35 juta di kampus Darul Quran Kuala Kubu Bharu.

Seramai 300 orang peserta terdiri daripada Pengetua-Pengetua Maahad Tahfiz Al-Quran Negeri, pensyarah-pensyarah instituti pendidikan al-Quran serta pegawai-pegawai yang berlatar-belakangkan pendidikan tahfiz telah berkampung selama tiga hari di sepanjang simposium ini berlangsung bagi mendapatkan perkongsian pengalaman daripada tokoh-tokoh ilmuan al-Quran seluruh negara bukan sahaja dari Malaysia malah negara-negara lain seperti Algeria, Nigeria, Yaman, Mesir, Palestin, Turki, Jordan, Syria yang akan membentangkan kertas kerja berkaitan isu-isu pendidikan tahfiz al-Quran.

Sebanyak sembilan belas 19 kertas kerja pakar telah dibentangkan dengan empat tema yang dipilih iaitu:

1. Metod Pendidikan Tahfiz al-Quran
2. Metod Pengukuhan Hafazan al-Quran
3. Inovasi Pendidikan Tahfiz
4. Pembangunan Pendidikan Tahfiz al-Quran

Manakala dua tema telah dipilih bagi pembentangan selari (*parallel session*) yang telah diadakan pada hari pertama Simposium iaitu:

1. Kaedah Pembelajaran dan Pengajaran (PdP) Pendidikan Tahfiz al-Quran
2. Metod Pengukuhan Hafazan al-Quran



*Nota : YAB Timbalan Perdana Menteri menyemak buku Memperkasa Generasi Penghafaz Al-Quran selepas merasmikan Simposium Tahfiz Al-Quran Peringkat Antarabangsa di ILIM, Bangi.*

## **KEM JATI DIRI BAGI PELAJAR PROGRAM SKM DARUL QURAN**

Kem Jati Diri Bagi Pelajar Sijil Kemahiran Malaysia Bidang Pengurusan Masjid Tahap 3 telah berlangsung dengan jayanya pada 14–16 Disember 2016 bertempat di Sedim Eco Theme Park & Resort Kulim, Kedah. Program ini melibatkan seramai 43 perantis dan diiringi oleh lima orang pegawai Darul Quran yang terdiri dari Tenaga Pengajar SKM dan Urusetia.

Tujuan penganjuran Kem Jati Diri ini adalah bertujuan untuk melahirkan perantis yang memiliki kemahiran holistik dan berketrampilan. Selain itu, kem ini juga bertujuan untuk meningkatkan ilmu pengetahuan, mengembangkan minda, menguatkan stamina fizikal dan memupuk kemahiran diri perantis dalam menjalani sebahagian kehidupan luar yang sebenar bagi merealisasikan konsep Khalifah Allah dalam diri mereka.

Antara program yang telah dilaksanakan di sepanjang kem tersebut adalah *Night Walk*, *Jungle Tracking*, Ceramah serta Pembentangan Tugas, *Mini Explorace*, Sukan Paintball dan Sesi Tazkirah oleh Perantis.

Keseluruhan program ini telah berjalan dengan amat baik dan lancar. Impak daripada program ini telah memberikan pendedahan kepada perantis untuk berfikir secara kreatif, inovatif dan mampu berdikari dalam menyelesaikan masalah. Perantis juga didedahkan tentang peranan mereka sebagai penghafaz al-Quran dan sebagai Bilal yang akan mampu menguruskan masjid dengan penuh komited di samping membina keyakinan diri untuk berdepan dengan masyarakat dari segi emosi, rohani, jasmani dan intelektual.



*Nota : Sesi pembentangan kumpulan.*